

# Dritter Theil

## dieses Buches.

In welchem die aller Kunst vnd sinnreichste Regul Coss/ vnd was darbey zu berichten nötig/ gehandelt wird.



**S** ist kein zweiffel/ wie es dann das werck ausweist/ vnd die vornembsten RechenMeister gleich stimmende zu geben/ Das die zu nechst abgehandelte Regul Falsi/ ihren vrsprung vnd Fundament/ aus der zuvor beschriebenen vortrefflichen Regul De tri habe/ also : das deswegen ausführung zu thun/ vnd worte zu verlieren ganz vnötig / Wie nun dieses gewis ist / als ist auch gleicher gestalt / außer allem zweiffel / das die Regul Falsi anleitung vnd vrsach gegeben/ Den Proportionen vnd vergleichungen/ weiter nachzudencken/ vnd nachmals den Proces gemeldeter Regul Coss zu erfinden/ vnd von zeit zu zeit weiter auszubreiten/ Dann wie bey der Falsi/ fur dis/ so zu wissen begehret/ nemlich fur das Facit / allewege Zahlen/ nach eines jeden gutachten vorgenommen/ der auffgabe nach Examiniert/ vnd durch dero daraus erwachsenden Proportionen/ die gewisheit erfunden worden/ also wird bey der Regul Coss/ jeder zeit vnd bey allen Exempeln vor sich genommen/ eine bedeutung einer Summa/ mit welcher nach der auffgabe verfahren/ vnd durch gewisse vergleichung/ das rechte Facit erlanget/ vnd befunden werden kan/

Als :

In vorgehendem theile bey der Regul Falsi/ lautete das erste Exempel/ wie folget : Einer spricht zum andern/ du hast hundert  
B. v. iij. Taler//